

畸

堂

摘

藁

倚堂摘藁卷之十

墓誌

鄧君墓誌銘

方山鄧君卒且葬竹泉先生狀其質行旣授應
元曰子爲銘而應元不敢辭銘狀曰君諱縉字
廷肅先世海寧人南渡宋時一誠父遷仁和於
是爲仁和人族寔大矣下一誠父若干世而爲
處士政政生贈監察御史禎禎生雲南按察司
副使公輔君之父也贈孺人宋氏君前母也封

孺人王氏君母也以成化丁酉九月三日生君
君生六十年爲嘉靖丙申五月十日卒卒明年
爲丁酉十二月十六日廼克葬南山塋有子一
曰太學生霓女一曰愛王許聘金鑰孫一曰繼
曾君少穎達受經爲舉子業已而棄去略涉群
史盤盂之書稱說事成敗犁然傾聽然不以取
世資年旣壯按察公春秋高君隱居奉親親以
爲安按察公卒獨事王孺人愈益謹外暮歸卽
寢所跪前咕囁爲孺子慕蓋孺人色然笑也初

宋孺人生伯子經而王孺人生仲綸次君次紳
咸侔儻有度居相愛也君夙興視王孺人膳畢
趣治具召諸昆弟更爲會少選客至歌詩投壺
象箴錯陳趙瑟奏前以是爲樂窮日而君顧獨
篤信忼慨有節士風槩旣交道廣然不肯附有
勢者卽所游寒士傾心禮嚮之緩急與貧不以
倉猝事故爲解以是鄧君之賢益聞而鄧君方
營方山別業將老焉自稱方山居士躬視田作
與傭伍相勞苦鄉之貧甿保君如長率推贏市

義得其驩心初君娶俞氏無出繼娶凌氏竹泉先生女弟也君四十未舉子及凌夫人娠君因稱曰吾所不足非財也顧獨少胤嗣今所產卽幸丈夫子盡蠲貧民之負幸女蠲負半已而果舉丈夫子於是火券旣卒鄉里諸常德君者歟然號曰公死吾孰依者應元少時受易竹泉先生所雅聞方山君而方山君先君執友也及應元以名舉鄉時時待先君過方山君方山君交父子間益驩已奉先君宦所聲相聞也間旬日

先君不祿君亦卒家今年與覓同治葬山中見
相嚮泣也應元旣痛先君厚德不報食列其大
略求聞者論著而又強爲鄧君銘銘曰

有窿巖巖滂其出雲不需其逢謂卽者群無
曰卑斯彼澤則窈餅之桔之無寧爾勞沸彼
濫泉秩秩其委固南山藏爾後不匱

故朝列大夫王公墓誌銘

予讀唐太史所爲保障成功圖敘稱王大夫之
伐著矣而終以諛自免悲夫功名之際瑕郤端

萌要小大歸殊然古今人情有異哉方逆濠徽
禍註誤 聖朝士大夫怵邪說惕虛聲崩喪沮
讐伏匿不能出氣持兩端陰訶利不利爲偪附
不可勝數也賊兵傳安慶有順流大江窺金陵
之志吳楚之裔微騷動矣當是時王公爲徽州
同知退然儒生也然一承推擇任用奮不顧憂
其私提五六千素非拊循之兵出祁門爲聲援
倚不測之鋒保城府六邑之衆救輯而完聚之
雖非有與成敗之數哉然而杖正委義示急病

無所讓難使人緩急有以賴之斯其人可與黜
桀巧避者道耶賊平 聞賜白金文綺階四品
論敘矣而同列始異議者嫉之擠沒其功卒不
大錄之公素質訥又憤恚面詬曰公等寧人耶
已而同列者入 覲傾之益甚公自度不能勝
遂乞致仕以 詔例進階朝列大夫居十餘年
爲嘉靖丁酉正月某日乃卒年五十有九戊戌
十二月庚申葬錢唐徐塢而予以媼家書其墓
石曰公名仲仁字體元先世錢唐人高祖禮洪

武間進士起家戶部主事終兩淮運使以職事
觸高皇帝喜怒適戍大理遂爲大理人曾祖
賢祖昱父元貞仍四世居大理弘治辛酉公舉
雲貴鄉試第二五上春官不利乃就選吏部試
第一授徽州府同知徽州畿輔地名爲郡實大
藩也俗健訟辦治吏率以材武勝公獨寬厚不
爲可喜名居數歲徽人竟以爲長者再上最且
有功皆不待有所遷徙棄官去乃曰錢唐吾故
家也遂止留初運使旣卒滇返葬錢唐公至訪

問族人得其墓處斬薙荒翳正界址樹表置用力既瘁焉久之買田宅種竹爲花榭藥闌略勝置書萬卷其中題曰玉谿別業蓋自稱玉谿道人先君子無恙時擇季女所宜歸曰王公長厚其長子良遂以爲歸及余奉先君泰安公寄書來曰吾遂已定居南郭南郭居有竹樹池亭老翁幸能詩壺觴自隨仰有掇俯有繳亦足以娛矣所未畢者婚嫁耳然吾終待公老此無何先君卒喪歸公來會哭間一歲公卒咸僅下壽爾

嗚呼哀哉嗚呼哀哉公為人謙恭好禮節煦煦
不疑可謂有德君子配朱氏凡生四男五女長
男曰應奎大學生次曰應弼應榮應芳女長曰
汝慶適文選負外趙汝濂次曰汝成適指揮同
知田銳餘幼公之葬右去運使若干步銘曰
其生也夷振也駉駉旣振而垂復歸于故丘
負乾登離川廻阜坻其安只且

禮部精膳司主事來君墓誌銘

嘉靖丙申歲吏部最天下有治行吏五十人上

名迹 天子請以爲從臣 制可於是五十人
皆徵入而丹陽令來君名在選中旣入拜兵部
職方主事改禮部精膳居有頃精膳主事臣汝
賢昧死言曰臣幸以甲科待罪縣令爲 陛下
護元元無狀 陛下不以臣能薄拔擢郎署臣
志分榮矣而臣不幸有犬馬疾不能朝夕門下
汚省署臣不勝大願願賜罷臣得近醫藥再望
見 闕庭願盡死力於是 天子哀憐之與告
歸歸五日爲閏十二月朔日卒于家年僅三十

六爾嗚呼賈誼短折歐陽詹生李賀皆不待終
養死又何其不幸之軌一也造物者不常幸生
才幸生才而中道委棄不觀其成此又何也中
世獎右浮靡士習益陋經生不能究明指歸馳
外踵殘以幸利祿文士則湊飭偶儷剽掇故藻
爲容澤此猶不能涉靡曼堂戶烏睹爾雅深厚
哉來君起童子華采振暴及壯沉思道術採抉
深眇自六經先秦漢以來諸家言貫穿附離檢
押其辭以肆其文然後其爲道閎衍奧雅將與

古作者同風而竟死矣豈非天乎始君鄉舉及
禮部試皆第二比當大對同對生謂來子必高
等已而第三甲同進士出身及當授官謂來子
必京朝諸郎官然竟奉新知縣也奉新江西陋
邑俗好訟抵訐鈐鑕務必勝不勝則陰伺持上
官短以責右已無何依違之不然立去君至批
根其尤數人痛抵以法旣而曰此非道化意也
於是開學館延進諸生爲指示經法爲文章躬
行如是而是諸生歸以諷其父老子弟父老子

第皆曰吾令良頗輯不為非諸部使者大異之
薦上其能凡在奉新十月而調丹陽丹陽道衝
兩都舟車至西郭門日數十百縣令日出出河
澗謁請諸大夫賢者磬折為禮視供具徒隸一
口指授無失賓客意久之歸縣中為民均賦
平爭訟調繇作不暇給矣又時時延進學官諸
生說經訓勸行如奉新時愈開廣館穀諷誦不
絕亦自其中心好樂之然已瘁甚竟嘔血死君
所至務興利在奉新開下五鄉塘陂水令田肥

饒視上鄉等在丹陽濬練湖溉田田少旱憂生
平嗜書自爲諸生至劇吏口未嘗廢稱說也雅
游自同年之雋與四方賢豪有名者皆願交親
之所與友善武進則唐順之閩中則王慎中錢
唐則楊祐以執學相取其樂善詡詡推置自喜
誠其中不能自解也觸情縱談不忌慮旁後人
亦以此忌之謗怒興矣夫賢者誠憎多口彼於
世齟齬其心蓋有所合也豈弟君子無信讒言
夫惟君子而後無聽語曰蓋棺事廼定來子死

至不能爲歛而謂其去而受同列之餽金也豈
不痛哉初君病甚應元省之涕泣執應元手曰
余有心子知之乃今已乎遂卒二歲而應元爲
論次其大節刻之墓石系曰來君諱汝賢字子
禹壬辰進士其先世河南鄆人系出宋龍圖學
士之邵之邵孫時知紹興死而葬蕭山遂爲蕭
山人去紹興十一世而爲君高祖雍雍生曾祖
珪珪生祖昉昉生父東母孫氏配安人錢氏仁
和人也生二男二女二男長曰獻策次曰獻功

二女長許聘山陰胡芾後二歲未嫁死次許聘
錢唐許暘孫應元子也銘曰

與子游兮澤宮庶見君子兮文以有容嗟君
子兮胡見爾樹松兮與子游兮上國庶見君
子兮文以有德嗟君子兮胡見爾樹栢兮巋
其窾中堅且好矣嗟君子兮遐不壽矣噫

有明湖廣提刑按察司僉事楊君夫婦合

葬墓誌銘

楊君諱祐字汝承一字晉卿世爲蘭谿楊塘著

姓曾祖永政徙嚴之建德祖莆田丞大昇再徙
錢塘於是爲錢塘人父象明易學爲錢塘學生
已而棄去教授閭里間夫人卽氏是生君君生
六歲能爲詩歌十歲受父易學十七補縣學生
十九當嘉靖元年領浙江鄉貢入京師道鄒曾
之墟過稷下周游渤碣之間登郭隗之臺慷慨
悲懷有統揖千古之意已而罷歸治一室河壩
散列群籍流覽其中而專覃思於經術於是君
之學益深博矣八年登進士第試月初生賦天

育驃騎歌改翰林庶吉士明年除知興國州考
薦輒最入爲刑部員外郎遇謫出知濮州稍遷
濟南府同知十八年擢江西按察司僉事復以
謫待次家居歲餘調補湖廣按察僉事二十二
年七月十日年四十暴疾卒於官先是江西巡
撫今司徒王公薦君文行卓偉宜令董學官當
有以風厲人士其後湖廣部使者又薦君器用
堪兵備皆報聞及卒士大夫交相弔曰嗟乎楊
子在何不可爲者今已矣初弘治間海內淳耀

搢紳先生翕然興於學厭時俗頽繭踣厲振迅
務撫先秦西京之畫而紉唐宋當是時北地李
獻吉尚型范而信陽何仲默貴幼眇號稱復古
天下嚮風焉大江以南文章奧區也於杭則故
翰林修撰江君景孚叅議吳君維新及君先後
崛起雄視中土君初與計吏上京師也吳君嘗
論敘送之以爲賈生明國體而匡衡推經術紹
嘉哲軌其在楊生君亦獨喜自負爲文章奔放
凌轢若馳車九折之坂而河決金隄莫之禦也

其議論雄辯勇決颺起泉涌卒然聞之駭汗愕
視至公才吏用自天性他人縮衄已獨奮前鋤
發穎脫旁不見曹伍然終以此見忌疾群擠偶
踣蹶益騰距豈非琦瑋卓詭不群之士哉君嘗
自詭仕官居職無以愈人使得當一校之任率
先士大夫能使人趨死不顧乘邊守塞雖不敢
徼一旦功然虜不足畏也時時以謂余嗚呼今
則死矣借令無死其所自樹將不與古所稱豪
傑者並驅乎雖使遭尤被謗退處岩穴固當托

志儒雅成一家之言附於作者之後而今之所
著白特其至微淺者耳君在兩州皆有惠愛民
思而碑之其在荆楚尤得士民心君卒卽爲祠
以祀所著有端居興國西曹鄆城濟南西江湖
上荆南諸集余欲爲會粹成書未果也君所至
學士輒從以講業晚蓋稱丹泉先生云宜人許
氏余再從婦也從祖刑部府君之孫族父邛州
府君仲女端靜婉順能通知古賢婦人事年十
八歸於君事大人相夫子皆有儀法凡歸楊氏

二十年如一日內外稱懿無間一辭年三十九
先君一日卒生二男子曰春先春元三女子一
適餘杭學生徐銑一許聘吏部主事張君子某
一許聘刑部主事王君子某始君夫婦相繼卒
諸子女皆幼纍纍持二喪歸父母老未克葬今
二十四年正月母氏又卒君之父卽以是年某
月某日合葬君夫婦於某山之陽謂余與君至
深命以銘銘曰

生之無故其曷畀之嫫謂有以生孰嶸嶸以

傾瑰辭琅琅光何離崇宮擊鮮暝何知罐然
白首穉齒犀曷不監是超若遺下何雙宮上
并峯骨肉歸是神曷之曷不驟虬躡虹霓浮
游紫庭返故棲君曷不聞我心悲

明故中順大夫順天府府丞省齋林公墓
誌銘

國家垂統理順求賢審官驅駕天下之豪雋歸
於科目慮旣周矣然猶廣薦引之路拔異能之
士俾在左右用以黼黻大猷積日累勞視其

功能而褒進之大者至卿士其次卽吏蓋非獨
其藝文知計足以耆官取資也亦忠信脩飭然
後乃致通顯云以余所聞林氏父子太常朴菴
公京兆省齋先生者蓋其人哉當 景皇帝時
搶攘多故文告四出館閣之間不暇給矣時則
太常攄其勞 今上欽明右文經緯乾運巨典
鴻謨金聲玉輝則京兆觀其盛嗚呼休哉斯豈
有遇合耶何其遭也京兆諱應禧字德夫太常
公之仲子也世爲錢唐人曾祖仲英祖森皆以

太常貴贈通議大夫太常寺卿太常以薦入翰林讀書授中書舍人歷位九卿階榮祿大夫以卒有四子長曰應祥當太常時以蔭補太僕寺主簿及其季應祿應禎皆先卒公以是獨侍太常公京師弘治丁巳復用薦入中書授鴻臚寺序班正德間逆瑾用事以不阿奉去官瑾敗復召用遷中書舍人九年遷大理寺副 今上初年纂修 武廟實錄公預勞焉遷尚寶司丞其後凡纂修公皆有事擢爲尚寶卿遷湖廣布政

司叅議仍領制勅事未幾進順天府府丞嘉靖乙巳以年踰七十例乞致仕天子許之以中大夫歸老錢唐旣歸五年巳酉九月九日卒於里第年七十有五公爲人厚重少言辭氣清粹望見之知爲長者旣名家子多所聞見而於書法尤精仍世見用皆以此名其官生平直已行意不能隨人上下傾仄貴寵間遭讒忌者數矣用忠實無他腸歸誠主上終以無咎侍經筵錫金幣視同列有異焉更事三朝歷四

十年潔已奉公仰奉入爲給不事餘資及歸無
長業諸族子爲謀有宅一區閉門屢空意泊如
也初公居家事親以孝聞其後伯兄死而視其
遺孤如已自出從父妹寡而貧爲撫教其子女
得以有養訓諸子皆以經法不爲世俗恩可謂
篤行君子矣前母董氏封淑人母唐氏元配錢
氏繼室李氏贈封皆宜人子男六政敦敞孜旻
旼政郡學生女六長適王坤次適陸九思次適
柴可損餘尚幼孫男三俊偉傑女一公卒之明

年某月某日政等乃葬公於某山之原而以予
友陸君佑所爲狀請予銘余故知公而陸君篤
信其言足徵爲之銘曰

六義肇興人文載宣昊軒倉籀其由邈綿保
氏司敎爰歷著篇尉律凡將分流異浴爰及
晉氏窮變極妍浩夏纖微績聖鈎玄童習未
窺白首不捐一得其要家名代傳唐宋及茲
千禩一源於惟林公承休象賢蒐輯百家歸
我大全職是奎章翰飛戾天進以能名位

以行騫有遂掖垣符璽是專臚臚京兆臥治
以兼匪藝之寵繫公德旃公以老歸鴻冥翺
翺五載不興哲人萎焉玄月靈日淹茂之年
藏公故丘光耿質潛何以銘之用竢變遷不
變不遷京兆之阡

奉訓大夫南京工部都水員外郎王君墓
誌銘

君諱一槐字蔭伯世爲仁和人曾祖廷玉國
初爲尚書郎祖銘父澄贈臨淄知縣母朱氏封

太孺人君幼穎敏工爲文及長好古學正德丙
子領浙江鄉薦數上春官數報罷以母老乞領
教職爲養授銅陵教諭君年少有文風儀峻美
諸上官咸屬目及叩所蘊博雅深厚褻然文儒
也交禮敬薦譽擢山東臨淄知縣是時四明陸
君爲按察副使提督學政方脩山東通志以撰
述事屬君志成有舊史遺法在臨淄七年政教
並舉頌聲旣作焉丁太孺人憂服除復補湖廣
應城縣應城隸承天府是爲 今上潛邸 獻

皇帝陵寢在焉百官上謁必道應城更繇繁夥
視異時不啻數倍君營措有方略求者畢給而
百姓按堵君既有惠於民民爭爲用上之幸
承天也供張帝幕甚設皆取給一時會代去其
後君者卒以不勝任死縣故無城君初爲城之
畚耒版築旬日而罷用治行高等 召入擢南
京工部屯田主事遷都水員外郎秩滿當轉官
是時君年且五十矣而三子連天喟然思歸於
是上疏乞骸骨詔許致仕旣歸蕭然一室以琴

尊圖史自娛閉門却掃意豁如也而時時與其
友郎仁寶門人吳子匡輩討究經術以屬書爲
事所著玉唾壺杜詩雌黃並可誦云初君為臨
淄以太孺人老不可奉以往則留其配張孺人
及弟三槐侍養然猶思慕不輟作思歸賦以見
志暨太孺人卒訃至君慟幾絕三槐多藝能然
性卞急醉或罵座君對之色愈和惟恐傷之其
孝友如此君與三槐俱無子既卒以從弟二槐
之孫世垣爲後配張氏封孺人孺人生三女毛

世奎來端言陸行健其壻也君生于成化丙午
八月十一日卒於嘉靖己酉二月朔日年六十
有四卒之月 日二槐率世垣將葬君王
岑山之原而持子匡所爲狀來請余銘壙中予
雅知於君不能辭也銘曰

有行有文位則愁矣艾而釋勤志則慳矣不
引其續厥聞則振矣

倚堂摘藁卷之十終

畸堂摘藁卷之十一

墓誌

墓碣銘附

鄉進士王君墓誌銘

嘉靖庚戌九月十有九日仁和鄉進士王子疾卒於南京大學之邸舍南京國子司業盧先生臨視哭出俸金助歛事與王子友者令咸助焉喪歸老母少婦奔哭毀焉幾死者數矣不能忍訣則舁柩歸殯其家嗚呼亦既甚矣既旬歲乃始謀卜葬王子之友潘君子栗書其素履而以

墓中之銘屬於余余與王子僚壻也烏能忍銘
哉初余婚於城頭徐氏徐氏者杭大族也余少
貧年十三受易於先師不能過庸婦翁靜厓先
生過先師獨視偉余惟一女遂以歸於我靜厓
先生有介弟曰兩山翁謹慤肅給尤睦於事兄
以是與余厚余內子視兩山翁之子猶同氣也
兩山翁異其仲女方擇所宜歸而王氏來請婚
兩山翁固先已耳王氏有子才暨請婚則未知
其果才歟購得其文讀之信則亟以胝於余余

乃後知王子之才是歲爲嘉靖辛丑余以郎奉
使過家事且竣而遇內子之喪兩山翁方自喜
有女得尚才士晚而悲猶子之夭也又二年癸
卯兩山翁卒甲辰余領夔州過家哭之其後四
年戊申靜厓先生又卒余哭於夔州徐氏耆舊
衰謝耗矣明年巳酉君乃舉於鄉聲籍甚士之
未第者皆曰嗟乎使舉士皆如王生者吾安能
無屈服哉余時滿赴考功過家造賀賓之末客
有進者曰咄嗟哉王子顯親揚名不當如是耶

君正色曰士之所自立寧獨此吾乃後知王子之才非獨爲其華者也且二翁之知人亦異矣吾雖絀於俗固日夜望君之顯融且一振徐氏之後而顧先凋喪矣悲夫君諱用賢字以寧先世爲蕭山人父慶賈於杭占籍仁和於是爲仁和人君少時受詩於寧都縣尹潘翊汝昭汝昭受於太僕丞姜南明叔固博達士有名故君詩學獨爲後進秀垂髫校藝學宮入異等務學精進卒成名庚戌春自禮部罷歸南入太學

觀舊京之盛慨然欲盡友天下之士而旣病矣
初盧先生都肄國子生得君文異之遍以示諸
生故君不祿而盧先生慟之君天性孝友行端
而志確其退讓冲厚固任道器也生二十有八
而死有子一曰維垣君始疾於閭里主人旣病
睨惟二僮在旁屈起謂曰若趣歸報吾母吾不
孝不能終事死矣然是命也慎無過傷爲書以
訣滿紙投筆而逝昔潘岳之妻與任濩之妻兄
弟也任子死安仁閔淑女悼遺孤爲作寡婦之

賦余睹君之婦與子也能無悲夫於是銘其墓
銘曰

驥服銜矣出門而蹶王旣錯矣乃碎於柙維
志與文爛不滅嗟王生兮從往昔

翁穉卿墓誌銘

穉卿名楠錢唐學生也父曰封南京刑部郎中
東泉翁名浩母宜人周氏杭人華而翁氏獨以
質行聞東泉翁不爲諸生言然篤信念於儒者
行身謹甚有三子長曰相長卿次梗次卿次穉

卿長卿之道惇大而忠信明恕而有執其學能
知聖人之深可施於用顧世無能知之者仕纔
至廣平太守年五十上書致其仕以歸穉卿少
而漸習東泉翁所履長受學元昆不殫勤教而
束脩飭備使者署藝行嘗第一予與廣平君友
穉卿亦兄視予爲人朗詣贍知正固以敏與人
處皆欲入於善得志欲使人人得職也嘉靖丙
午夏五月某日年三十有七未祿而卒初邑先
達曰吳先生維新旣冠其二子命曰士學文規

欲進身取高位易耳顧難成爲君子爲君子莫
近翁氏矣乃使從穉卿游予賢其意亦遣息熙
受學穉卿明尚書吳遵道生本爲春秋熙學治
易諸業尚書與非受經而慕從者蓋數十人吳
兩生最有名長卿爲虞部祿薄不給顧私家兩
老人不樂京師居居負西郭陋僦比舍間園稍
假燕息數寄書長卿幸盡節厲職無憂我養吾
食貧樂也穉卿固孝謹滋欲寧兄心攻苦服勤
夙夜不懈不顧間勞也所爲奉大人非身與義

所出一錢不以自溷予以都水使當反命 闕
下穉卿亟過予曰幸謂家兄親共養備無用念
也而長卿日守省中願移官南部得將父母辭
絕痛切 上爲許可尚書奏終得迎侍如章政
南部之三年穉卿感寒疾汗不出百方終不愈
長卿毀焉曰天乎竟用前瘳邪吾緒爲親求祿
身公家有九東西南北者爲有楠也今已矣吾
親殆哉業兩不成行兩不至子與臣乎吾不能
兼兩蓋始有意引去矣予在夔子聞穉卿死哭

之曰嗟哉翁子之不施也又將使兄施不竟其
後周宜人用思子遺疾終獨東泉翁臺而康廣
平白首率仲氏旦夕上食不關通人事釋卿娶
張氏生三子禹典縣學生後伯氏禹則縣學生
禹錫銘曰

先民有言惟孝友于德輶如毛民疇舉諸我
儀圖之惟釋卿甫惟時猶猶惟時與與於釋
卿甫旣質旣文不食爾德胡報爾勤嗟誰不
年孰先子穀匪子之違茲人不淑堂邪斧邪

南山出雲匪今人藏古孝之墳

東泉翁公墓誌銘

昔萬石君家以孝謹聞乎郡國雖齊魯諸儒質
行自以不及襄陽龐公不入城府夫婦相敬如
賓處污履約遺子孫以安此其人非必有學問
循習積索之漸卓詭辯博之能也天性自然合
乎大道令舉世皆若此亦何異上古時安事法
理哉道散文極真樸逾遠更千載乃見我東泉
先生翁公蓋厚厚庶幾淳德君子云先生名浩

字某其先嘉興海鹽人國初隸尺籍有土田錢塘因爲錢塘人少受書不爲章句學顧深達理要自勝冠至乎耄齒未嘗有僞言過行子孫化之搢紳之儒篤信好古惇大而諒直其餘固逡逡醇謹有友悌孝讓之節矣先生事父母至篤旦朝暮夕不以有急廢有出必謹告所之歸謹告兒歸矣一日屢出至十告不已旣沒告於祠堂少壯老猶一日嘗入京師先夫人家居感疾兩日愈此兩日在船中反側不能寐少寐即見

尋病狀驚而寤復少寐復見如初當與伯兄從
子析貲時有故徃吳郡是時胤子廣平太守相
甫十歲還書誡之曰吾誠耻是爾無取均焉廣
平奉教祇取一二羸弊者與宗婣處抵老無纖
介家初饒給亦時時與人錢通有羸利常歸之
人人見其長者取貸常負常棄之棄或至百金
貸卑退懦弱生不知有競心至勇義奮發萬夫
不能奪也行已如此以廣平貴初封工部虞衡
主事再進南京刑部郎中再承錫命有章服

自歲時謁神祀先外未嘗服側身里巷往往野
人服與交舊燕嬉山水間足不一蹈公府郡請
鄉飲賓不得已爲一往其後十餘請皆不肯往
曰國家舉成周之典吾老人一再周旋其間榮
矣母多恩諸公爲也余與廣平友以通家子進
見先生先生雅誦口然未嘗不聞仁義忠孝之
言退視廣平所履造次必則古昔曰吾懼倍家
君教也廣平在京師數移書專厲以盡節首公
無憂我貧有子爲清白吏吾樂也嗟夫此與奮

父父子篤行及古所稱沉冥嚴遵德公輩亦何以異哉曾祖某祖某父某皆潛德不仕前母金氏母陸氏配曰周宜人實齊德以左右訓齊子姓生三男子長廣平太守相也次梗次楠生員二女子長受楊璽聘未行卒次嫁王守廉孫男五禹典禹則俱生員禹疇禹某禹某孫女七生員虞鳳來葛汝誠生員陸濂生員徐子直方可登鄒國禮錢某其壻也穉猶待年曾孫男二立紀立度初廣平爲虞衡以親老乞分司留都便

扶養是改刑部奉二老以行其後周宜人卒旣
三年擢守廣平奉先生廣平旣又致其仕奉歸
錢塘皆左右就養也歸錢塘之五年春秋七十
有九嘉靖丙辰三月二十一日考終於新寢卒
之年十二月二十一日啓三台山宜人之藏合
葬焉廣平君泣謂余曰知吾父深莫子若也惟
是壙中宜有銘敢以請余曰方遘閔凶痛巨不
能爲文辭君曰子知吾父深烏可以服爲解謹
爲銘曰

士咸知誦法孔氏而出入或悖所聞有以生
澆淳之後乃獨冥心太古之元默以守中同
而不群質仁履信安事巧文此東泉公之行
也獨馴謹云哉哲人是篤亦大厥門雖有朱
紱不棄葛屨嗚呼後世茲日有亢矣尚無隕
於斯言

江子儀墓誌銘

子儀諱表姓江氏子儀字也杭州仁和人其先
汴徙歷宋至皇明爲郡著家景泰間曾祖玘

進士起家仕爲某科給事中終山東右叅政叅
政公幾子其長曰隱君諱澄隱君二子其季曰
江淮衛知事諱昕子儀父也隱君有聞弟曰文
昭公諱濶自編脩積官翰林學士南京禮部尚
書祇德飭官以有令謚當其時應元從祖刑部
府君以方雅博文名播紳間兩人相慕重締好
故知事君委禽於我姑氏是惟刑部府君仲女
今太夫人也知事君倜儻愛人家盡費於賓客
仕不讐志年四十餘用國子久次拜一命以卒

卒之時子儀年十四五自江淮徒手隨喪歸諸女弟釋弱滿室有宅一區其餘未有以慰太夫人意能自念非苦刻厲不足自振於是束身銷志求經師有明法者受其學綴文緝業日日有聲以明春秋弱冠選爲學官弟子未幾正員廩食督學憲臣每試必上第期首薦者數矣然終不第也子儀從祖諸父顯者曰工部侍郎瑞石公曉翰林脩撰亶爰先生暉祠部員外郎巨石公曜工部翰林以春秋先後魁天下然兩公常

稱嗣我者必表也員外工文用詞賦名家時時
令子儀爲之又喜曰子不爲進士業也者當以
此名矣子儀既久不得志憤曰結髮受書未嘗
敢一日棄業也而孱者常先鳴此誠有命哉親
且老不可久居約乃稍稍裒衣囊易以爲子錢
貸能周流不窮歲率收數倍息行之十年稍益
饒矣益市田廬收其租入又倍於是闔室以奉
太夫人甘膳時進乃言曰幸頗無內顧憂雖長
矣猶度幾一奮效當年之用無何疽發於背卒

嘉靖戊午七月十有三日也年四十有四始諸
幼女弟四三人益長以次當適人子儀爲裝送
頗備其後子女婚嫁半畢比卒亦無餘財也子
儀三娶初娶毛氏卒繼娶張氏卒又繼姚氏皆
有出暨側出有子男凡五人鍵鈞銑鉅銳女五
人壻曰王長吉許承惠陳煥董崇禮承惠杭州
前衛指揮使其幼許嫁祝氏子某子儀性介特
少與初與湖廣僉憲楊祐汝承善而宗戚昆弟
頗禮敬予同舍生則親黃鳳鳴岐卒之年春爲

具召余與鳴岐飲談噉終夕間數月不相見鳴岐來謂余江子病且力余卽走候之不見見姑氏涕泣曰兒且死矣奈何越明日來訃哀哉旣議塋其甥進士聞謨書其家世行迹請予銘銘曰

童而孤委躬於儒始乎約終安且樂施於有家是亦爲政命往違才弔來倚慶與兮奪兮孰歛璜兮窅兮密兮問冥伯兮

中山先生墓誌銘

嘉靖戊午三月八日中山先生張伯生卒應元
與廣平太守翁相長卿走會哭治允歛事明日
浙江左布政使希齋陳公來弔復會哭陳公推
俸爲葬具就唁其孤經紀本業之旣廣平曰嗚
呼伯生已矣不可使無聞於來世乃狀其行而
使應元銘之狀曰伯生之先本姓馮氏趙之君
子館人宋建炎初武功大夫寶南徙吳興其子
忠翊郎安國仕台州死葬臨海因爲臨海人曾
祖拱杓再徙錢塘杜爲豐城主簿生子存璘存

璘生子鎮仕爲福清訓導遷高安教諭教諭公
娶吳氏是生先生諱乾元字伯生伯生常曰我
中山人也學士因稱之曰中山先生云始教諭
公五歲而孤父之友壻張瑀者撫以爲子以是
從其姓伯生時時語其友予爲張氏立後乃復
吾姓竟未復以死伯生負奇誕節好爲倣儻非
常畫策學無所不窺然要以建功立事爲用說
經亦往往以後世事爲解覽往籍稱引事成敗
若與其人對語也與人論學疾高華曰卑之吾

欲使食其實吾之師賈誼陸贄也道榛蕪久吾
力而闢之家世爲舉子學顧指爲小技而自雄
其才欲以所獨得櫟括取祿位曰使我由此負
任當世事吾安用此軀爲藉第令不施於事猶
當以言死不能呷些嚙些沉浮取兒女子寵也
憤疾邪枉時時好出位言天下大事又喜談兵
島夷難作當事者與縉紳先生圖戰守計未嘗
不在其間所指畫有足發憤憤然無能用之者
生平舍已所事事赴人之急嘗葬友人三喪損

服食行質貸棺歛族婣之貧而死者行之終其身不變少時從先公游閩中以是與希齋公相友厚善及公來爲郡守又數年爲布政使交禮如一日公不以已貴有所加於伯生伯生亦不以貧賤故非禮有謁於公士以此兩賢之初先公旣歿無長業伯生徒步入台南山中收集逋負買田百畝有兩異母弟皆授以事無何仲喪其貲病死田廬無幾矣伯生固大度士不能別治生窶甚太息曰嘻士貧而餓死職也寧當使

老稚轉委溝壑乎於是從友生先貴者相周旋
有規無從主人周之則曰吾所得受也且以免
諸人死嗚呼斯亦曩時高陽狂生街亭卒之疇
非耶士固有多自奉而同產一不得入其門夫
以伯生之貧而恤其亡弟生姊收其孤嫠四三
人三十年不倦如何哉如何哉爲文敏疾多奇
所著無事公傳毛穎問荅等篇數千言古詩文
數百篇瓌怪宏放類其爲人然終困一第丁巳
秋始貢於有司而病不可作矣生於弘治戊午

五月二十五日得年六十有一妻陳氏生子男
三靖翊端廣平之辭云爾初應元與伯生長卿
及仲凱舜佐邵梗良用講業吳山之陽五人者
志相得也伯生常以謂苟皆得效用願有以淬
厲著白於世不望相推轂取高位方是時伯生
氣銳甚遇流俗人不能忍視中有所觸常終夕
咄咄不寐起兩目作炬光向人髮三十餘盡白
矣其後予爲泰州伯生書抵予高自閔悼辭旨
橫決且曰兄弟三人有田五十畝均之則三人

皆饑捐之則二人飽一人饑不如捐之於是并
宅一區盡以與兩弟獨跳身出夫婦僦斗室以
居予爲戲語寄之曰世事何煩雪滿顛憐君三
十氣無前肘邊金印何時掛郭外今無負郭田
蓋伯生常自許有縱橫才用且曰吾雖儒衣冠
乎然吾節俠也其後仲子貢未上春官卒翁子
邵子同舉進士爲郎出典郡領方州之筵二子
果皆有聞可傳後如伯生指獨余最不肖濫於
末行而伯生終窮以死悲夫銘曰

使驥捕鼠笑於徃裡干將以綴履曾不若彼
纖錐壯夫有懷曠世與期營彼秉庾爲孺子
嗤爲壁毀喜兮與珉完鄙兮等歛於斯氣獨
上指兮

邛州府君墓碣銘

先子都水君從父昆第十人皆出自貞裕貞裕
五子其伯早卒次二曰刑部員外郎兩峰府君
次四曰處士兩湖府君應元大父也大父事刑
部謹故二宗爲尤睦刑部四子長漳州衛經歷

是爲經歷君次京兆驛丞是爲京兆君次邳州
吏目次海豐知縣海豐有改葬述先子有系畧
邳州府君者諱有年字曰時登邑里具系畧中
少有大志多才能以治易爲錢塘學生買田城
南耕且學自稱南田居士偃仰高睨已而隨資
入國學爲國子生爲人博達瞻知好倣儻計畫
美須髯神采如畫辯議談笑風生聞者常屈服
家世燕薊性亢直不能詘曲下人人有過行失
言不能容卽衆折之退亦無訾也然以是少所

親附慷慨樂善喜趨人之急常舍已所欲為事
人之事士亦以此賢之往來京師游父執名公
貴人間聲藉甚大司馬蘭州彭公澤剛正人也
最先器重曰許生國士也今上初謁選銓曹太
宰東光廖公紀與公有舊使人逆謂公無來謁
當以東南百里為寄或漏言焉爭名者為飛語
撼之於是注邛州吏目公笑曰此命也又奚咎
初刑部府君嘗為裕州及將就選夢刑部坐堂
皇南嚮已立北嚮揖於是乃驗邛故臨邛也俗

多富人徃徃持金錢結州中僚吏出入舒肆公
無所交私有坐即盡法吏民憚之邛守襄陽鄭
傑伯興者故文選郎中謫也一見待以上佐交
驩若兄弟為揚譽諸公間諸公爭知之事醜髒
難斷者即以屬公立斷檄攝華陽縣郡中倚辦
而公約已首公不為私家計負其行能守是多
觸於是有中之者矣公亦益自薄其官竟默默
不得志去蓋應元釋褐之歲也後十二年癸卯
卒於家距生成化甲午年六十有九初刑部元

配黃宜人生公兄弟三人繼室朱宜人生海豐
君公仁孝友弟事母兄順甚奉朱宜人入謹候
顏色出則慕思如實生已者與海豐言議若恐
傷之而群從則禮敬先子云應元自知學侍諸
父几席竊規器度皆寬博魁岸大人法言莊色
無日不邇暨乎從政十餘年間凋喪盡矣而先
子最蚤逝痛矣哉欲復聞長者之教可得乎可
得乎公配謝夫人生二男子曰應奎應期四女
子長適錢塘學生陸緯次適湖廣按察僉事楊

祐次適沅陵主簿徐振次適仁和學生夏邛孫
男五伯虬伯蛟某某孫女一銘曰

室有嚴丈人迫近憚之黃髮曠矣我修亦隳
番番府君乃父乃師膏屯於邦有家是施謇
謇辭訓斤斤令儀宛其逝矣我宗具腓邇矣
典刑悠哉我恩凡我後人求此刻詩

尚堂摘藁卷之十二

故梁孺人墓誌銘

梁孺人姓江氏諱美完家世錢塘人處士梁橋之配其先曰禮部員外郎謙有名員外生處士壽處士生思古先生諱瑛孺人父也爲校官弟子久之入太學有資序矣然終不肯謁除雅意丘園云思古旣生孺人八歲而授女史孝經稍知義故已令輟去曰是足爲婦矣及歸梁氏而姑氏嚴孺人聽事得其歡心姑有疾醫師殆

之孺人憂不知所出蒼皇刲股肉進之有瘳更數年乃卒遺少子女孺人咸字之曰我不得終事大人以是慰地下人以是賢孺人無間梁君喜賓客讌會搏杳孺人曰爲張具而時時屏聽退論客才鄙及事得失甚理梁君旣好游或醉飽歸孺人問所游即賢梁君者則喜如不勝即非人則咨嗟不色憚間時言之以是梁君嚴敬孺人比卒大慟曰喪我良友旣久愈益悲思之鄉人歲蠶貧民貸桑富室率先書券入及桑貴

踊富人破先書券者更售高價孺人見老父道
仆問知爲主人給悔桑悶不欲生哀之曰是父
不蠶且誠死言梁君遺桑數百而老父果得不
死嗚呼斯亦足賢也孺人凡生子四二男子曰
山巖二女子曰愛王聖金其生爲弘治甲寅三
月廿一日卒爲嘉靖年月日年四十有二梁君
卜葬先兆食而以丁酉月日率山等從事其原
甘泉銘曰

質選曼勇割膚嗇爲常振塗枯揚世芬界子

儒大茲營永者丘

沈孺人墓誌銘

沈孺人者仁和王元案內子也王子爲南京大理評事滿三歲以最赴考功行歸其孥浙上旣發孺人疾動卒於舟中已王子如京師引對闕庭詔贈其父浩南京大理評事母羅妻沈贈皆孺人繼母蔣封太孺人王子捧書太息曰令吾婦忍死湏臾不當親承寵光報佐我勞苦乎而乃不待命也始沈氏居城東王氏居城西

族姓相望爲郡著家兩氏祖皆長者相愛兩父
又相愛故孺人歸於王氏入門不逮事先姑是
時贈君盛賓接士大夫燕會紛還事神奉先享
祠殷衆孺人攝內政無不如贈君指贈君晚有
繼室是爲蔣太孺人齒少孺人事君姑謹不以
少於我失子婦禮無何贈君卒孺人哭極哀孝
奉太孺人愈益至太孺人貞居二十年矢死靡
他雖本志峻潔亦繇安孺人故也至他壺行尤
備睦婣族撫孤嫠皆有恩紀云初贈君常稱我

道用雍容都邑中有餘矣顧未足更吾門乃遣其子學儒王子爲學生孺人謂曰觀大人所以命君意念深矣不折節有聞豈有以慰其心哉妾聞之家計小談害遠業者也妾請任之師友講議裊身而利行君其無倦焉王子感其言砥躬自奮卒成名以文行聞於四方四方之士無不願知王子者余辱不鄙與友時時過其家談詠終日庭中不聞人聲與客對有頃不耳語僮僕而有羞出中庖甚設及君靈璧孺人爲飭屏

以內至爲肅清察廉擢佐廷尉平亭疑法皆有
名迹聞乎天子寵章赫然施及其親下逮家
室果成贈君之志烏乎王子其賢矣迹孺人所
以夙夜儆戒弼成君子者不猶驗歟孺人諱王
鳳字瑞姬生於正德甲戌十月二十日卒於嘉
靖丁巳三月二十四日年四十有四凡生三男
子紹科紹名紹賢二女子適鄭斯麟張杞堃有
日王子自爲狀泣以授予曰疇昔子不數過我
乎宜知吾婦幸焉我壙中銘銘曰

士百其行夫子是匡女哲弗哲議飲食酒漿
婦順明章士譽則光穀也同戩歿乃來章噫
嗟乎尚有聞歟慰夫子傷

徐母汪孺人墓誌銘

鄉進士徐君琇述其世母汪壺行因族子九臯
請銘其墓九臯予母黨之自出予方懼太宜人
憂用大事故不敢圖死矧其爲文辭九臯曰維
族母潛德隱懿宜有紀於達者是用固恩於舅
氏予固辭不得曰苟無用文則諾志之曰徐孺

人姓汪氏諱孟端杭人徐翁某之配父曰汪某
母楊氏孺人生鍾愛於父擇可歸乃歸徐翁歸
徐翁且六十年後翁六年瘍發於頸卒杭故汴
徙也地都會謠俗具五方高事浮侈獨城南緣
江十餘里倚岼巷術綿絡萬家曰江干是爲故
杭遺民習尚淳樸疾力作業頗異城中人徐氏
世居江上與汪同里徐翁年五歲時喪其父能
不狎於童穉以肅給底成孺人承以儉德蚤起
盱食家益以有裕教習兩子及孫皆有義方言

而撫視進士君如已自出終以成名逮諸孫誦
習不絕鼎鼎盛矣孺人姓孝姑有疾未嘗不下
泣祈年未嘗不以身禱身之外無問也事夫子
能曲意候顏色於勞事有可身代者身代之賓
祀非已出曰不敬也生於成化庚子十二月二
十八日卒於嘉靖丙辰六月十四日年七十有
七生二丈夫子曰恩憲一女適邢鵬恩之出男
曰大用女長適阮東臯次適王元輔憲之出男
曰大經大倫大有女長聘孫鑛次二未字曾孫

女一銘曰

歲執徐月在亥未盡六日冬始權龍華開儷
南山阡右川左麓中兩賢旣固且安宜子孫
石丘陳先生繼室孫孺人墓誌銘

孺人姓孫氏家世錢塘人故太僕寺丞諱文貴
之孫衡州知府諱安之子仁和石丘陳先生配
也陳氏之先徙自汴宋居越之上虞宋之季年
再徙仁和而墓於城西甘谿原終元之世以爵
號別塚墳者三世凡數人 皇朝初振胤父子

仍世爲儒學博士胤兩子其長曰南康府君諱
敏政終南康太守歿有思於民配食濂溪考亭
之祠南康八子其季曰京兆府君諱良器自廷
尉平歷郡守叅政左右布政使應天府尹以卒
無子以兄良能之子爲後石丘先生宋也先生
初娶施氏荆王長史魯之女早卒繼室以孺人
方衡州爲刑曹郎時孺人從京師不字曰女賢
必以妻良士及先生喪初配五年不得其偶京
兆府君謂其夫人曰必欲如施新婦賢者非孫

公女不可於是馳幣行媒氏京師求聘焉孫公
乃以妻先生孺人在女氏其父教以孝經女史
論語能爲正體書至女事締葛組繡飲食尤善
方是時兩姓鼎貴而孺人閑於典訓入門醴饋
饗酬無違禮旣廟見京兆府君去官齊魯閩楚
之間多歷年姑氏戴恭人實從以行而孺人佐
其君子庀家政恭儉肅雍內外和理先生得委
已問學有令譽於時者孺人力也孺人以府君
暨恭人在官所不得親饗饋故脯膾之間不絕

於道及歸老於家然後躬佐餽益虔不衰比卒
終事皆盡敬盡哀與孝子等事恭人四十年姑
婦皆白首然不異始執笄見時也孺人生於成
化己亥十月十九日卒於嘉靖丁巳四月十三
日年七十有九去石丘卒之歲十有五年矣兩
子承孫皆先卒而以曾孫其俎主後初施孺人
生子直而孺人生子知方均養齊訓皆有名直
舉進士未官卒知方仕爲成都袁州兩府推官
二女長適吳浹次適汪世恒孫男二曾春俱國

子生女二長適陸相次適李若泉曾孫男二其
姐其豆豆郡學生女二長適馮有翼次許饒士
龍玄孫男一紹科孺人在陳氏六十年逮事舅
姑及見其曾玄上下六世可謂至盛然罹變者
數矣獨無恙貞固考終以其餘力撫教遺胤孫
使續序先業不墜蓋且有復其始者嗚呼豈非
天乎卒時無疾病呼茗飲漱而逝其姐卜以
年 月 日扶孺人之柩祔葬於先姑禮也孺
人從子貴州僉憲君克昌述懿範使來乞銘銘

曰

惟陳氏阡三百其禩有葉有條施於孫子發
祥隤祉八世有歸不隊如帶系惟女士以我
前聞畀爾來似有嚴孝孫敬復其始孝孫繩
繩蒸畀祖妣有施弗圯

胡孺人李氏墓誌銘

胡子喪其偶而賢泣以語其友廣平太守翁子
翁子問葬有日乎有日矣於是著其語爲書使
問銘於許子是時許子將如京師見胡子之戚

也不敢以行爲解乃受而銘之按狀勅封孺人李氏肇慶太守仁和胡君純之妻太子太保兵部尚書端敏公之宗婦也李氏其先大鬻鹽白魯祖忠以來四世高貲忠分財嘗推多與兩弟其少弟爲室美亦舉以讓其兄由是李氏有義聞少弟絕不嗣以伯氏之孫諱繼先者爲後始所推貲孫復終享之鄉人用以爲勸也繼先公娶海寧顧氏是生孺人孺人生不煩訓誡少長有婉婉稱端敏公聞之爲肇慶君納聘焉

端敏公忠誠著於社稷載在策書當時所共推
轂並進佐成 中興大業皆天下偉人士大夫

非賢者不敢妄自接於公以此觀所與爲婚姻
可知也孺人始入門時公位尊顯矣然素廉服
用涼儉有踰萌庶取婦得富家子意其不安孺
人固自安其後公薨肇慶君繼有祿位服行先
公之訓尤謹孺人終其身不踰侈蓋亦自有天
性非獨漸摩使然也肇慶君初仕爲督府都事
奉使閩粵友 命便過家會其同產姊病留孺

人視姊疾疾愈孺人入京師其弟李生護行道
病歿齋裝直三千金人以爲李公所生孺人姊
弟兩人耳弟歿無子齋裝宜歸孺人肇慶君怒
曰人死因利其所有可謂廉乎孺人以此不敢
私錙銖盡以歸其弟家方是時人皆多胡君而
賢孺人初孺人未舉子生兩女又不育大懼隊
厥宗即廣爲肇慶君謀側室已而孺人獨有子
諸側室顧多生女孺人與已女均字之嘉靖戊
午十一月六日孺人年五十有六卒所生一男

三女男曰清胄兩側室亦生三女凡女子六人而適皆兄六人其行者壻曰錢塘吳遵道郡學生次仁和沈偁次餘姚謝用標次錢塘林椿行而待年者曰錢塘童學書最幼曰錢塘茅某俱名公世家子肇慶君嘗稱孺人豈非吾益友哉吾惟謗孺人厲以自修吾嫉惡甚孺人廣以省刑今老矣顧安得復聞是言而廣平亦盛稱胡君忠信交道不污佐督府遇驕帥廉知自將蟬然遠其害歷三府在朝稱賢大夫出典嶺海

郡教令利澤可施於後為良二千石相聞有德者必刑于其家以此知孺人之賢不虛也予曰元與肇慶君游所聞亦若此銘曰

惟理氏玄冑嬪於嫡後不參不忌續太保之祐太保有孫邦伯有子孰引孰翼於宗婦受祉著蔡謀從宗婦宅是以俛百祀宜爾孫子太保是似

誥封宜人包氏墓志銘

誥封宜人包氏者安次許子繼室也其先娶之

蘭谿人曾祖良佐正統間為吏科給事中死土
木祖弘六安州知州父悱獲鹿縣教諭松憲先
生先生始占籍於河南之沈丘縣嘉靖甲申六
月生宜入於沈丘後二十年癸卯歸許子京師
後十年壬子四月八日卒於錢塘里第年二十
有九姑許子為郎喪其初妻同署郎海虞馮冠
語之曰子良大夫也宜得賢偶吾從母兄包先
生有季女請以媒於子曰包先生者孰誰哉馮
公為詳其鄉邑父祖曰是而鄉之世德名家也

馮公耆老信厚省中推祭酒語不妄於是請於
太宜人聘納焉宜人歸許氏從許子仕於朝出
官庸蜀之間凡六七年其侍太宜人醺醺沃盥
者三四歲耳然太宜人曰善事我許子有弟亨
為刑曹郎常請於兄曰願以婦氏學於丘嫂亨
前婦有遺女曰蒞宜人字成之歸於壻氏其舅
姑曰新婦素教習有禮也許子有兩妹族黨宗
姻甚盛無不賢宜人者宜人治家方嚴僮僕御
媼肅甚許子有四方之事議不內顧以有治之

者也辛亥秋有事於銓選越明年猶須次不得
歸家用衆資財不能繼宜人瘁焉於是病卒訃
來京師許子哭閭里主人數慟絕曰傷哉死以
我故也久之徙官粵臬癸丑春歸哭藁葬乃去
越四歲丙辰正月卜地得武林山之西乳竇峰
下卜日庚申兆皆食於是禮葬而許子又在遼
陽不果臨穴使孝子長豫終事焉傷哉傷哉我
之懷矣戚有旣哉宜人母曰壽春張夫人張夫
人賢所以教飭諸子女尤備而宜人獨聰明異

甚又習聞父兄詩書之言是用無違禮於許氏
許子有三子宜人之產曰季紆銘曰

殯不哭封不視以從王事澂于原武于止澂
爾孫子